



Predložen pritvor za pet članova duhanske mafije uhapšenih u akciji "Lištica"

NOVAČ ZARAĐEN ŠVERCOM DUHANA TROŠILI NA KUPOVINU SKUPIH VOZILA

Od 14 privedenih osoba, pritvor zatražen za Zlatka Marijanovića, Stanka Čolaka, Miru Kvesića, Gorana Marijanovića i Ljubicu Čolaka. Za tri mjeseca prodali 55 tona duhana

Za Zlatka Marijanovića (1977), Stanka Čolaka (1987), Miru Kvesića (1958), Gorana Marijanovića (1979) i Ljubicu Čolaka (1968), koji su uhapšeni u akciji „Lištica“, nakon saslušanja u Tužilaštvu BiH zatražen je pritvor, potvrđeno je u ovoj pravosudnoj instituciji.

Oni su osumnjičeni da su kao članovi kriminalne grupe, za tri mjeseca prodali najmanje 55 tona duhana oštetivši budžet BiH za oko 7.850.000 maraka. Istovremeno, na ovaj način sebi su pribavili imovinsku korist veću od 1.200.000 maraka, koje su trošili za kupovinu nekretnina i skupocjenih automobila.

-Pritvor je predložen jer postoji mogućnost da bi boravkom na slobodu osumnjičeni pobjegli, ometali istragu, sakrili ili uništili dokaze, utjecali na svjedoke ili ponovili krivično djelo - navodi se u saopćenju

Tužilaštva BiH. Ova grupa je pod istragom zbog organiziranog kriminala, porezne utaje, nedozvoljenog prometa akciznih proizvoda, nedozvoljenog skladištenja robe i pranja novca. U akciji „Lištica“, koju su po nalogu Tužilaštva BiH izveli istražitelji **SIPA-e** u saradnji sa kolegama iz kantonalnih MUP-ova, u Grudama, Širokom Brijegu, Čitluku, Zenici i Sarajevu, privedeno je ukupno 14 osoba, dok je oduzeto više od 23 tone duhana. Tokom pretresa oduzete su i tri mašine za sječenje duhana, veća količina novca u gotovini, četiri automobila, te više od 800 kutija cigareta različitih marki bez porijekla, te još neki predmeti koji će poslužiti kao dokaz u daljem postupku.

Pripadnici ove kriminalne grupe osumnjičeni su da su od novembra 2015. do februara ove godine krijumčarili više

desetina tona rezanog duhana i duhana u listu. Dalje su ga prerađivali, a potom prodavali preprodavcima i kupcima širom BiH, a da pri tome nisu plaćali PDV i fiskalne obaveze.

Za ostale uhapšene, kažu u Tužilaštvu BiH, nakon saslušanja, bit će predložene mjere zabrane. U četvrtak su istražitelji pretresli 25 lokacija, a izme-

đu ostalog pretreseni su i neki objekti u sarajevskom naselju Rakovica, gdje je nađeno oko dvije tone sjeckanog duhana. Ovo je inače nastavak akcije „List“, koja je pokrenuta prošle godine i tokom koje je oduzeto više od deset tona duhana, koji je trebao završiti na crnom tržištu BiH.

Z. Đ.



Istražitelji oduzeli više od 23 tone duhana